

## ■ REGENZA

# 400 000 francs per studis olimpics

**(anr/gc) Enconuschentamain è sa furmà en il Grischun in comité per Gieus olimpics 2026 en noss chantun. Presidià vegn quel da directur Andreas Wieland.**

Dacurt ha gì lieu in inscunter dal comité era cun cuss. gov. *Jon Domenic Parolini*. La regenza ha sin quai prendì enconuschientscha dal project. Fertant ch'il comité lavura grautitmain basegnan ins tschertas expertisas per pudair formular las propostas da dar vinavant. Per tals studis ha la regenza miss a disposiziun 400 000 francs. Il mars duess la proposta per Olimpia 2026 esser tar il Comité olimpico naziunal. Alur turna la chausa tar la regenza che avess dad elavurar ina proposta per mauns dal cussegel grond.

### Sa gidar cun Val S. Pieder

Il president da la regenza, cuss. gov. *Christian Rathgeb*, ha retschavì da curt ina brev da vischins da Val S. Pieder che fan gronds quitads. Ins ha dumandà il guvern per in discurs co i duai ir vinavant cun il svilup en vischnanca. Oravant tut vai per sclerir tut tge projects che la SA 7132 da *Remo Stoffel* ha en vista. Perquai han era pli che 100 vischins e vischinas da Val S. Pieder lantschà ina iniziativa per che la vischnanca survegnia ils sis milliuns francs che Stoffel ha gì empermess per ina nova hal-la polivalenta. La regenza ha tractà la chausa e vegn a responder sin l'istanza.

### Gì dapli custs per il FEM 2016

Per garantir la segirezza durant il Forum economic mundial (FEM) 2016 a

Tavau han ins gì calculà cun ina basa da custs en l'import da ca. otg milliuns francs. Quels sa repartan sin la confederaziun, il chantun, la vischnanca da Tavau ed il FEM sez. En vista al privel terroristic creschent sin il mund han ins stuì prender quest onn mesiras supplementaras per garantir la segirezza d'in dumber adina pli grond da participants internaziunals. Quai astgass dentant er avair chaschunà custs supplementars da plirs tschientmillis francs.

Co quels vegnan repartgids è da reglar tranter ils organisaturs purtaders. – Cun gronda satisfacziun ha constatà la regenza ch'il FEM da quest onn saja stà in success cumplain e sa splegà senza incaps.